

Peqqinnissaq pillugu sillimmasersinnaanerup atuutilersinneqarneratigut peqqinnissaqarfitsinnut oqilisaataasinnaanersoq pillugu apeqquaqat aallaavigalugu oqallisissiatut siunnersuut
(Atassutip Inatsisartuni ilaasortaaitai)

Akissuteqaat

(Peqqinnissamut Naalackersuisoq)

Atassutip Inatsisartuni ilaasortaaitaasa oqallisissiatut siunnersuutaannut qujanaq. Peqqinnissaq pillugu sillimmasersimanissaq Kalaallit Nunaanni siammalereersimavoq, tassami innuttaasut 10.000-it tamatumani pineqarmata. Peqqinnissaq pillugu sillimmasiissutini atuuttuni misissuineq, pilattaanerit annikinnerusut aamma tarnip pissusaanik ilisimasalimmit misissortinnerit matussuserneqartarput. Peqqinnissaq pillugu sillimmasiissutit katsorsaanerup sapaatip-akunnerisa pingasut ingerlaneranni aallartinneqarsinnaaneranut nalinginnaasumik qulakkeerinnittarput, aamma Danmarkimi napparsimmavinni namminersortuni nunaniluunniit avannarlerniittuni allani pineqartut isumagineqarsinnaallutik. Misissuinissat katsorsaaniissallu nunap avataani pisarnerannut pissutaavoq, ullumikkut peqqinnissaqarfiup peqqinnissatigut ikiorsiissutigisinnaasaasa killeqarnerujussuat. Kalaallit Nunaanni peqqinnissaq pillugu sillimmasiissutit namminersortut suliffeqarfiutaanni sulisunut ajunngitsorsiassatut atorneqartarput. Sulisunut ajunngitsorsiassaq tamanna pisortat suliffeqarfiutaanni atorneqarneq ajorpoq. Taamaattorli innuttaasut tamarmik peqqinnissaq pillugu sillimmatinik pisinissamut periarfissaqarput. Nunanit allanit misilittakkat takutippaat, peqqinnissaq pillugu sillimmatinik atuinerusoqartillugu pisortat peqqinnissaqarfisigut aaqqissuussaanerannut oqilisaataasoq. Siullertut katsorsaanerit peqqinnissaq pillugu sillimmatinit matussuserneqartartut taaneqartartut tassaapput innersuussinikkut katsorsaanerit. Tassa nakorsap katsorsarnissamut pisariaqartitsisoqarnerisooq nalilertarpa. Katsorsaaneq akileraarutitigut tamakkiisumik akilersorneqartartoq nammineerluni ilaannakortumik akilerneqartalissaaq. Tamatuma saniatigut innuttaasoq peqqinnissaq pillugu sillimmateqarnermigut misissorneqarlunilu katsorsarneqarnissamut qulakkeerneqassaaq. Peqqinnissaq pillugu sillimmatit inuttut nammineq aningaasartuutaasarlutillu inuttut ajunngitsorsiassaapput, tamatumalu malitsigisaanik ullut napparsimaffiusussat ikinnerussapput taamalu BNP-mut iluaqutaassallutik aamma pisortat aningaasaqarnerannut pitsanngorsaataassallutik. Kalaallit Nunaanni innuttaasup peqqinnissaq pillugu sillimmateqarnermigut, sillimmatissiissutit qanoq annertutigineri apeqquataatillugit, Kalaallit Nunaata avataani misissorneqarnissamut katsorsarneqarnissamullu assigiinngitsutigut neqeroorfigineqarsinnaavoq, sillimmatilli angalanermi akunninnermilu aningaasartuutitut qaqutiguinnaq matussusiiinnaasarput. Peqqinnissaq pillugu sillimmateqarnikkut

peqqinnissaqarfik tunngaviatigut, sillimmasiussalli misissortinnermut katsorsartinnermullu atatillugit aningaasartuutitut tamanut qaqutiguinnaq matussusiisinnaasarmata, sillimmatinik atuinerusoqalerneratigut naatsorsuutigineqartariaqarpoq napparsimasut nunani allani misissorneqarlutillu katsorsarneqarsimanerminnit uterminni Kalaallit Nunaanni peqqinnissaqarfiup suliassamik tigusinissaanik naatsorsuuteqarnissaat.

Taamaalilluni erseqqissumik akineqarsinnaanngilaq, peqqinnissaq pillugu sillimmatinik atuinerusoqarnerulerneratigut peqqinnissaqarfiup tatineqarsimanera annikinnerulissasoq annertunerulissasorluunniit.

Naggasiullugu oqaatigineqassaaq peqqinnissaq pillugu sillimmateqarnissamik aaqqissuussineq inuuniarnikkut equtitsisinnaasoq, pissakinnerimmi taamatut sillimmasiinissamut akissaqanngillat taamalu aaqqissuussamik iluaquteqarsinnaanatik.

Oqallilluartoqarnissaa kissaatigaara.